


# Switch Foundation a haya e honor di ta nomina pa e Premio Nacional di Teatro 2013

Comunidad mes a bira protagonista di e documentarionan di Switch TV

ORANJESTAD (AAN): Pa Switch Foundation tabata un sorpresa hopi grato ora cu nan a haya sa cu nan a wordo nonima pa e prestigioso Premio Nacional di Teatro 2013.

Tabata na 2011 ora cu Switch Foundation a cuminsa cu e soño, di mustra pa medio di documentarionan e realidad social cu por hiba un pais den decadencia si esaki no wordo duna su atencion inmediato.

E reto di Switch foundation semper a keda pa capta e



atencion di hoben y adulto, y e manera mas efectivo pa logra esaki ta via medionan audiovisual.

Durante Switch Foundation su trayectoria nan a bin ta ganando e confianza y cariño di docente, mayor, organizacionan como di e hobennan. E programanan di Switch ta basa riba investigacion y cu e unico intencion ta pa informa, educa y cu e speranza pa yuda

preveni situacionan social cu tin un efecto directo riba nos economia, turismo y cultura en general.

Switch Foundation ta kere 100% cu un manera efectivo pa capta atencion di e publico meta y wordo informa, ta uzando creatividad, den e caso aki haciendo uzo di arte audiovisual, actuacion y teatro.

Den e proceso di uza e hermentnan creativo aki, tambe Switch ta fungi como un biblioteca di investigacion digital, disponibel gratuitamente pa comunidad completo uza, como terapia of presentacionan. Tambe hopi importante ta e hecho cu atravez di e documentarionan ta duna e oportunidad di promove talentonan den desaroyo, en special nos hobennan.

Switch Foundation a bin ta

uni forza cu organizacionnan pa asina traha hunto y reduci gastonan, compartiendo recursonan y conocemento y asina sigui crece y desaroya hunto. Un logro reciente y hopi importante ta e partnership cu Cas di Cultura, cu pronto lo wordo anuncia oficialmente, y Departamento di Cultura, na unda seccion di implementacion ta cooperando cu direccion di arte.

Den cada programa di Switch ta involucra hoben y mayornan, y ta crea obranan teatral cu ta papia di nos situacionan social local y den nos idioma. Ora di involucra comunidad den e realizacion di cada programa, creando dramatizacionan di storianan real y obranan teatral, comunidad mes ta bira e protagonista, e responsabel pa informa y educa e amiguito, e mama, e tata of e colega.

Switch Foundation kier yama danki na Sr. Mirto Lacle di Instituto Pedagogico Arubano, Cas di Cultura y Departamento di Cultura pa kere den e proyectonan y pa duna e team di Switch e gran sorpresa y honor di ta nomina pa e Premio Nacional di Teatro.

Pa motibonan di salud, Paula Nahr, Fundador y Producer di Switch Foundation no por tabata presente durante e ceremonia special aki. Sinembargo, e tabata hopi entusiasmo y a expresa: "Nominacion of premionan nunca tabata e objetivo di nos lucha, pesey e reconocimiento aki riba su mes ta nos triunfo, nos trofeo".